



Tužilaštvo/Tužiteljstvo Brčko distrikta Bosne i Hercegovine
Тужилаштво Брчко дистрикта Босне и Херцеговине
Prosecutor's Office of the Brcko District of Bosnia and Herzegovina

<http://jt-brckodistriktbih.pravosudje.ba>



Trg pravde 10, 76100 Brčko distrikt Bosne i Hercegovine; web: jt-brckodistriktbih.pravosudje.ba; tel: 049/217-227; faks: 049/219-088; e-pošta: jtbd@jtbd.ba
Трг правде 10, 76100 Брчко дистрикт Босне и Херцеговине; web: jt-brckodistriktbih.pravosudje.ba; тел: 049/217-227; факс: 049/219-088; е-пошта: jtbd@jtbd.ba

SAOPĆENJE ZA JAVNOST

Pljačkao kuće, pomoćne objekte i vikendice **Optužnica za seriju od deset teških krađa**

Tužilaštvo Brčko distrikta BiH podiglo je optužnicu protiv Jasmina Kantića (30)* zbog sumnje da je proteklih mjeseci u više naseljenih mjesta južno od Brčkog počinio seriju teških krađa. Višestruki povratnik u vršenju imovinskih krivičnih djela optužen je da je provaljivao u kuće, pomoćne objekte i vikendice na području Gornjeg Rahića, Maoče i Prutača, odakle je oduzimao stvari male vrijednosti.

U okviru istrage vođene pod nadzorom Tužilaštva, Policija Brčko distrikta BiH početkom prošlog mjeseca uhapsila je Kantića zbog sumnje da je zadnjih nekoliko mjeseci u Gornjem Rahiću, Maoči i Prutačama, nakon provaljivanja u zatvorene prostore, oduzimao imovinu od stanovnika ovih naselja. Sumnja se da je od 26. januara do 1. aprila čak deset puta provalio u kuće, pomoćne objekte i vikendice na tom području, odakle bi oduzimao stvari male vrijednosti. Nakon što bi podesnim predmetom provalio u unutrašnjost objekata, on je uglavnom prisvajao sitni alat i manje kućanske uređaje podobne za brzu prodaju, a gdje bi to pronašao oduzimao je hranu i piće. Sličnu tešku krađu počinio je i u jednom poslovnom objektu u G. Rahiću, kada je 25. marta ispred prodavnice *Stara česma*, po obijanju katanca, iz rashladne vitrine oduzeo razna pića vrijednosti od oko 100,00 KM oštetivši za taj iznos vlasnicu objekta - navodi se optužnici.

Pošto je otkriven i doveden u direktnu vezu s krivičnim djelima, Policija ga je lišila slobode 4. aprila, te ga je nakon kriminalističke obrade predala Tužilaštvu. Njega je potom u tužilačkim prostorijama ispitao postupajući tužilac koji je, nastavivši njegovo krivično procesuiranje, protiv osumnjičenog podnio prijedlog za određivanje pritvora. Da bi se osiguralo njegovo daljnje prisustvo i uspješno vođenje krivičnog postupka, Osnovni sud Distrikta prihvatio je tužilački prijedlog i Kantiću, usljed opasnosti od ponavljanja krivičnog djela, odredio pritvor u trajanju od jednog mjeseca. Tužilaštvo je u međuvremenu podiglo optužnicu protiv Kantića optuživši ga za krivično djelo Teška krađa (iz člana 281 stav 3 Krivičnog zakona Brčko distrikta BiH). Optužnica, kojom je zatraženo i produženje pritvora Kantiću, dostavljena je Osnovnom sudu Brčko distrikta BiH, gdje je u cijelosti potvrđena.

*Preduzimanje radnji krivičnog gonjenja prema određenom licu ne znači da je to lice zaista i odgovorno za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

Tužilaštvo Brčko distrikta Bosne i Hercegovine 11.5.2022. godine

GLAVNI TUŽILAC
ZEKERIJA MUJKANović